

四庫全書

史部

欽定四庫全書

唐會要卷八十五

宋 王溥 撰

團貌

武德六年三月令以始生為黃四歲為小十六歲為中  
二十一為丁六十為老 開耀二年十二月七日勅百  
姓年五十者皆免課役至神龍元年五月十八日制二  
十二成丁五十九免役

因韋庶  
人所奏

至景雲元年七月二十

一日勅韋廢人所奏成丁入老宜停

省司舉徵租調殿中侍御史楊瑒執

之曰韋廢人臨朝當國制書非一或進退卿士或赦宥罪人何獨于已役中男重徵丁課恐非保人之術省司

遂依瑒所執

天寶三載十二月二十三日赦文比者成童之歲即挂

輕徭既冠之年便當正役憫其勞苦用軫于懷自今以

後百姓宜以十八已上為中男二十三已上成丁至廣

德元年七月十一日赦文天下男子宜二十五歲成丁

五十五入老 九載十二月二十九日勅天下郡縣雖三

年定戶每年亦有團貌計其轉年合入中男成丁五十  
九任退團貌

雜錄

武德九年十一月簡點使左僕射封德彝等以中男十  
八已上簡取入軍勅三四出給事中魏徵執奏報不可  
上怒乃召徵作色謂中男若實小自不點入軍若實大  
是其詐妄依式點入於理何嫌卿遂如此固執徵正色  
曰臣聞竭澤而漁非不得魚明年無魚矣焚林而畋非

不獲獸明年無獸矣若次男以上並點入軍租賦雜徭將何取給且比來國家衛士不堪攻戰豈為其少但為禮遇失所遂使人無鬪心若多點取人遽充其數雖多終是無用若精簡壯健遇之以禮人百其勇何必在多陛下每云誠信待物欲使官人百姓並無矯詐之心今之共理所寄惟在縣令刺史年常團貌並悉委之至於簡點即疑詐偽望下誠信不亦難乎上曰初見君固執疑君蔽於此事今論國家不信乃是人情不通所令取中

男宜停

延載元年八月勅諸戶口計年將八丁老疾應免課役及給侍者皆縣親貌形狀以為定簿一定以後不得更貌疑有奸濫者聽隨時貌定以付手實

開元二十九年三月二十六日勅天下諸州每歲一團貌既以轉年為定復有籍書可憑何至勞頓不從簡易於人非便事資釐革自今已後每年小團宜停待至三年定戶日一時團貌仍令所司作條件處分

天寶四載七月二十日勅今年諸郡因團貌宜便定戶  
自今已後任依恒式應緣察問對衆取平准今載三月  
五日勅處分

八年閏六月五日制其天下百姓丈夫七十五已上宜  
各給中男一人充侍仍任自簡擇至八十已上依常式  
處分

定戶等第

武德六年三月令天下戶量其資產定為三等至九年

三月二十四日詔天下戶三等未盡升降宜為九等

永徽五年二月八日勅天下二年一定戶

萬歲通天元年七月二十三日勅天下百姓父母另外  
繼別籍者所析之戶等第並須與本戶同不得降下其  
應入役者共計本戶丁中用為等級不得以析戶蠲免  
其差科各從析戶祇承勿容遞相影護

開元十八年十一月勅天下戶等第未平昇降須實比  
來富商大賈多與官吏往還遞相憑囑求居下等自今



已後不得更然如有囑請者所由牧宰錄名封進朕當處分京都委御史外州委本道如有隱弊不言隨事彈奏

天寶四載三月勅朕聽政之餘精思治本意有所得庶益於人且十一而稅前王令典農商異宜舊制猶闕今欲審其戶等拯貧乏之人賦彼商賈抑浮情之業優劣之際有深察之明閭里之間無不均之歎頃以人不欲擾法貴從寬所以比來未全定戶今已經數載產

業或成適可因茲平于賦稅自今已後每至定戶之時  
宜委縣令與村鄉對定審於衆議察以資財不得容有  
愛憎以為高下徇其虛妄令不均平使每等之中皆稱  
允當仍委太守詳覆定後明立簿書每有差科先役高  
等矜茲不足庶協彞倫

廣德二年二月十一日赦文天下戶口委刺史縣令據  
見在實戶量貧富作等第差科不得依舊籍帳

貞元四年正月赦文下兩稅更審定等第仍令三年一

定以為常式

元和六年正月衡州刺史呂溫奏當州舊額戶一萬八千四百七除貧窮死絕老幼單獨不支濟等外堪差科戶八千二百五十七臣到後團定戶稅次檢清出所由隱藏不輸稅戶一萬六千七伏緣聖恩錄臣在道州微効擢授大郡令撫傷殘臣昨尋舊案詢閭里承前徵稅並無等第又二十餘年都不定戶存亡孰察貧富不均臣不敢因循設法團定檢獲隱戶數約萬餘州縣雖不

徵科所由已私自率歛與其潛資於奸吏豈若均助於  
疲人臣請作此方員以救凋瘵庶得下免偏枯上不闕  
供勅旨宜付所司

元和十五年正月穆宗即位勅曰天下百姓自屬  
艱難棄於鄉井戶部版籍虛繫姓名建中元年以來  
改軍舊制悉歸兩税法久即弊奸濫益生自今已  
後宜准例三年一定兩稅無論土著客居但據實  
產差率

戶口使

開元十二年八月宇文融除御史中丞充諸色安輯戶口使天寶四年二月戶部郎中王鉷加勾當戶口色役使

籍帳

舊制凡丁新附於籍帳者春附則課役並徵夏附則免課從役秋冬附則課役俱免

其詐冒隱避以免課役不限附之早晚皆徵之

武德六年三月令每歲一造帳三年一造籍州縣留五

比尚書省留三比

儀鳳二年二月二十四日勅自

今已後裝潢省籍及州縣籍 景龍二年閏九月勅諸籍應送省者附當州庸調車送若庸調不入京僱脚運送所須脚直以官物充諸州縣籍手實計帳當留五比省籍留九比其遠年依次除皇宗祖廟雖毀其子孫皆於宗正附籍自外悉依百姓例

開元十八年十一月勅諸戶籍三年一造起正月上旬縣司責手實計帳赴州依式勘造鄉別為卷總寫三通

其縫皆注某州某縣某年籍州名用州印縣名用縣印  
三月三十日納訖并裝潢一通送尚書省州縣各留一  
通所須紙筆裝潢並皆出戶內每口一錢其戶每以造  
籍年豫定為九等便注籍脚有析生新附者于舊戶後  
以次編附二十九年二月勅自今已後應造籍宜令州  
縣長官及令錄事參軍審加勘覆更有踈遺者委所司  
具本判官及官長等名品錄奏其籍仍寫兩本送戶部  
天寶元年正月制節文如聞百姓之內或有戶高丁多

苟為規避父母見在別籍異居宜令州縣仔細勘會其一家之中有十丁已上放兩丁征行賦役五丁已上者放一丁即令同籍共居以敦風教如更犯者准法科罪三年正月十六日勅天寶三年改為載者所論前後年號一切為載具後造籍記歲月云若干載自餘表狀文章並准此

其年二月二十五日制天下籍造四本京師東京尚書省戶部各貯一本五載六月十一日勅自今已後應造籍



帳及公私諸文書所言地四至者改為路

十二載正月十二日勅送東京籍宜停

寶應二年九月勅客戶若住經一年已上自貼買得田地有農桑者間有移於莊蔭家住及自造屋舍勒一切編附為百姓差科比居人例量減一半庶免逃散者大歷四年八月勅名籍一家輒請移改詐冒規避多出此流自今已後割貫改名一切禁斷

逃戶

證聖元年鳳閣舍人李嶠上表曰臣聞黎庶之數戶口  
之衆而條貫不失按此可知者在於各有管統明其簿  
籍而已今天下流散非一或違背軍鎮或因緣逐糧苟  
免歲時偷避徭役此等浮衣寓食積歲淹年王役不供  
簿籍不挂或出入關防或往來山澤非直課調虛蠲闕  
於恒賦亦自誘動愚俗堪為患禍不可不慮也或逃亡  
之戶遇有檢察即轉入他境還行自容所司雖具設科  
條頒其法禁而相沿為例莫肯遵承縱欲亂其愆違加

之刑罰則百州千郡庸可盡科前既依違後仍積習檢獲者無賞停止者獲免浮逃不悛亦由於此今縱使搜檢而委之州縣則仍襲舊蹤卒於無益臣以為宜令御史督察檢校設禁令以防之垂恩德以撫之施權衡以御之為制限以一之然後逃亡得還浮寓可絕所謂禁令者使閭閻為保遞相覺察前後規避皆許自新仍有不出輒聽相告每糾一人隨事加賞明為科目使知勸沮所謂恩德者逃亡之徒久離桑梓糧儲空闕田地荒

廢即當賑其乏少助其修營雖有欠賦懸徭背軍離鎮亦  
皆捨而不問寬而勿徵其應還家而貧乏不能致者乃  
給程糧使達本貫所謂權衡者逃人有絕家去鄉離失  
本業心樂所在情不思還聽於所在隸名即編為戶夫  
顧小利者失大計存近務者忘遠圖今之議者或不達  
於變通以為軍府之地戶不可移關輔之人貫不可改  
而越關繼踵背府相尋是聞其逃亡而禁其割隸也就  
令逃亡者多不能總許割隸猶當計其戶口等量為節

文殷富者令還貧弱者令住檢責已定計科已明戶無失編人無廢業然後案前躅申舊章嚴為防禁與人更始所謂限制者逃亡之人應自首者以符到百日為限限深不出依法科罪遷之邊州如此則戶無遺人無匿笑矣

景雲二年監察御史韓琬上疏曰往年人樂其業而安其土頃年人多失業流離道路若此者臣粗言之不可勝數然流離之人豈愛羈旅而忘桑梓顧不得已也皆

以軍戎屢興賦斂重數上下逼促因為游人游情既多  
窮詐乃作既窮而詐犯禁相仍又以嚴法束之法嚴而  
犯者愈衆古人譬之亂繩則已結矣而不務解結乃急  
牽引之則結逾固矣今刻薄之吏是能為結者強舉之  
吏是能牽引者解結者未見其人

開元九年正月二十八日監察御史宇文融請檢察免  
役偽濫并逃戶及籍田因令充使於是秦勸農判官數十  
人華州錄事參軍慕容琦長安縣尉王永太原司錄張

珣大原兵曹宋希王大理評事宋詢長安主簿韋利涉  
汾州錄事參軍韋洽汜水縣尉薛侃三原縣尉喬夢松  
大理寺丞王誘右拾遺徐楚璧安成縣尉徐鶚長安縣  
尉裴寬萬年縣尉崔希逸同州司法邊冲寂大理評事  
班景倩榆次縣尉郗庭倩河南府法曹元將茂洛陽縣  
尉劉日正至十二年又加長安縣尉王壽河南縣尉于  
儒卿左拾遺王惠翼奉天縣尉何千里伊闕縣尉梁勛  
富平縣尉盧怡咸陽縣尉庫狄履溫渭南縣尉賈晉長

安縣尉李澄前大理評事蕭廩業皆當時名士判官得人於縣獨盛分道安輯戶口檢括田疇並客戶議者深以為擾人不便陽翟縣尉皇甫憬上疏曰太上務德以靜為本其次務化以安為上但責其疆界嚴立隄防山水之餘即為見地何必聚人阡陌親遣檢量故奪農時遂令受弊又應出使之輩未識大體所由殊不知陛下愛人至深務以勾剝為計州縣懼罪據牒即徵逃戶之家鄰保代出鄰保不濟又使更輸急之則都不謀生緩之則憲法



交及臣恐逃逸從此更深至如澄流在源止沸由火不可不慎今之具官尚逾萬數蠶食府庫侵害黎民戶口逃亡莫不由此縱使伊臯申術管晏陳謀豈息茲弊若以此給將何以堪雖東海南山盡為粟帛亦恐不足豈括田稅客能周給也上方委任融侍中源乾曜中書舍人陸堅贊成其計貶憬為益州尉于是諸道招得客戶凡八十餘萬田亦稱是州縣希旨務於多獲皆虛張其數有以實戶為客者歲終得客戶錢百萬一時進入官

中由是擢拜御史中丞言事者猶稱括客損居人上令  
集百寮於尚書省議公卿以下懼融思深皆雷同不敢  
有異詞惟戶部侍郎楊瑒獨建議以為搜客不利居人  
徵籍外田稅使百姓困敝所得不補所失未幾瑒又出  
為外職

二月二十八日勅檢獲招誘得戶口應合酬者具有課  
戶皆須待納租庸然後論功

十八年宣州刺史裴耀卿論時政上疏曰竊見天下所

檢客戶除兩州計會歸本貫已外更合所在編附年月  
旬滿須准居人更有擾務即此輩僥倖者令徵課稅即  
目擊未堪竊料天下諸州不可一例處置且望從寬以  
天下大勢而言竊計有剽田者不減三四十州取其剽  
田遁融支給其剽地者三分請取一分已下其浮戶任  
其親戚鄉里相就每上戶已上合作一坊每戶給五畝  
充宅并為造一兩口屋開巷陌立閭伍種桑棗築園蔬  
使緩急相助親鄰不失丁別量給五十畝已上為私田

任其自營種率其戶於近坊更共給一頃以為公田共  
令營種每丁一月役功三日計十丁一年共得三百六  
十日營公田一頃不啻得足計平收一年不減一百石  
便納隨近州縣除役功三百六十日外更無租稅既是  
營田戶且免征行安樂有餘必不流散官司每丁收納  
十石其粟更不別支用每至不熟年斗別二十價然後  
支用計一丁一年還出兩石已上亦與正課不殊則官  
收其役不為務縱人緩其稅又得安舒倉廩日殷久遠

爲便其狹鄉無剩地客戶多者雖此法未該准式許移  
窄就寬不必湏要留住若寬鄉安置得所人皆悅慕則  
三兩年後皆可改塗剩地盡作公田狹鄉總移寬處倉  
儲既實水旱無憂

二十四年七月勅諸州應歸首復業者比來每至年終  
皆當州錄奏自今以後宜令牒報本道採訪使同勘當  
歸首人每州略單數同一狀奏仍挾名報所由

天寶八載正月勅朕永念黎元務弘愛育所以惠政頻

及善貸相仍亦將克致和平登于仁壽如聞流庸之輩  
漸亦歸復浮食未還其數未足靜言此色蓋亦有由皆  
為牧宰等授任親人職在安輯稍有逃逸耻言減耗籍  
帳之間虛存戶口調賦之際旁及親鄰此弊因循其事  
自久寤寐興念良用憮然不有釐革孰致殷阜其承前  
所有虛挂丁戶應賦租庸課稅令近親鄰保代輸者一  
切並停應令除削各委本道採訪使與外州相知審細  
檢覆中牒所由處分其有逃還復業者宜有優恤使得

安存縱先為代輸租庸不在酬還之限

十四年八月制天下諸州逃戶有田宅產業妄被人破  
除并緣欠負租庸先已親鄰買賣及其歸復無所依投  
永言此流須加安輯應有復業者宜並却還縱已代出  
租稅亦不在徵賠之限國之役力合均有無比來應定  
門夫殊非得所每縣中男多者累歲方始一差中男少  
者一周遂役數徧既緣編併豈可因循自今以後諸郡  
所差門夫宜于當郡諸縣通率准式納課分配令得均

平

至德二年二月勅諸州百姓多有流亡或官吏侵漁或盜賊驅逼或賦斂不一或徵發過多俾其怨咨何以輯睦自今以後所有科役須使均平本戶逃亡不得輒徵近親其鄰保務從減省要在安存

乾元二年四月勅逃戶租庸據帳徵納或貨賣田宅或攤出鄰人輾轉誅求為弊亦甚自今已後應有逃戶田宅並須官為租化買取其價直以充課稅逃人歸復宜並



却還所由亦不得稱欠租賦別有徵索

寶應元年四月勅近日已來百姓逃散至於戶口十不半存今色役殷繁不減舊數既無正身可送遣鄰保祇承轉加流亡日益艱弊其實流亡者且量蠲減見在者節級差科必冀安存庶為均濟

其月勅百姓田地比者多被殷富之家官吏吞併所以逃散莫不由茲宜委縣令切加禁止若累日再有違犯當倍科責

其年五月十九日勅逃戶不歸者當戶租賦停徵不得率攤鄰親高戶

廣德二年四月勅如有浮客情願編附請射逃人物業者便准式據丁口給授如二年以上種植家業成者雖本主到不在却還限任別給授

大歷元年制逃亡失業萍泛無依時宜招綏使安鄉井其逃戶復業者宜給復二年不得輒有差遣如有百姓先貨賣田宅盡者宜委本州縣取逃死戶田宅量丁戶

充給

貞元十二年六月趙州刺史皇甫政奏貞元十年進綾  
穀一千七百匹至汴州值兵逆叛物皆散失請新來客  
戶續補前數上使謂宰臣曰百姓有業則懷土失業則  
離鄉客戶者咸以遭罹苛暴變成瘡痍之人豈可重傷  
哉可罷其率特免所失物

長慶元年正月赦文應諸道管内百姓或因水旱兵流  
離死絕見在桑產如無近親承佃委本道觀察使於官

健中取無莊有人丁者據多少給付便與公驗任充永業不得令有力職掌人妄為請射其官健仍借種糧放三年租稅

會昌元年正月制安土重遷黎民之性苟非難窘豈至逃亡將部招綏必在資產諸道頻遭災沴州縣不為申奏百姓輸納不辦多有逃亡長吏懼在官之時破失人戶或恐務免正稅減剋料錢祇于見在戶中分外攤配亦有破除逃戶桑地以充稅錢逃戶產業已無歸還不

得見在戶每年加配流亡轉多自今已後應州縣開成  
五年已前流亡之戶宜即令所在觀察使刺史差強明  
官就村鄉詣實檢會桑田屋宇等仍勒令長加檢校租  
佃悉勿令荒廢據所得與納戶內征税有餘即官為收  
貯待歸給還付如欠少即與收破至歸還日不須徵理  
自今已後二年不歸復者即仰縣司名人給付承佃仍  
給公驗任為永業其逃戶錢草斛斗等計留使錢物合  
十分中二分已上者並仰於當州當使雜給用錢內方

圓權落下不得尅正員官吏料錢及館驛使料遞乘作人課等錢仍任本戶歸復日漸復元額

大中二年正月制所在逃戶見在桑田屋宇等多有暫時東西便被鄰人與所由等計會推云代納稅錢悉將斫伐毀折及願歸復多已蕩盡因致荒廢遂成閒田從今以後如有此色勒令老人與所由并鄰近等同檢勘分明分析作狀送縣入案任鄰人及無田產人且為佃事與稅納如五年內不來復業者便任佃人為主逃戶

不在論理之限其屋宇桑田樹木等權佃人逃戶未歸  
五年內不得輒有毀除斫伐如有違犯者據糧口量情  
與科責并科所由等不檢校之罪

咸通十一年七月十九日勅諸道州府百姓承佃逃亡  
田地如已經五年須准承赦文可便為佃主不在論理  
之限仍令所司准此處分

唐會要卷八十五

欽定四庫全書

唐會要卷八十六

宋王溥撰

奴婢

舊制凡反逆相坐沒其家為官奴婢

反逆家男女及奴婢沒官皆謂之官

奴婢男年十四已下者配司農十五已上者以其年長令遠京邑配嶺南為城奴也

一免為蕃戶

再免為雜戶三免為良人皆因赦宥所及則免之

凡免皆因

恩言之得降一等二等或直入良人諸律令格或有言官戶者蕃戶雜戶之總號非謂別有一色



武德五年安州刺史李大亮以破輔公柝功賜奴婢百  
人大亮謂曰汝輩多衣冠子女破亡至此吾亦何忍以  
汝為賤隸乎一一皆放還高祖聞而嗟賞更賜奴婢二  
十人

顯慶二年十二月勅放還奴婢為良及部曲客女者聽  
之皆由家長手書長子已下連署仍往本屬申牒除附  
諸官奴婢年六十已上及廢疾者並免刪

永昌元年九月越王貞收諸家僮勝衣甲者千餘人于

是制王公已下奴婢有數

如意元年四月十七日勅逆人家奴婢及緣坐等色入官者不須充尚食尚藥驅使

萬歲通天元年九月勅士庶家僮僕有驍勇者官酬主

直並令討擊契丹

時契丹首領李盡忠攻陷營州也

大足元年五月三日勅北方緣邊州縣不得畜哭厥奴

婢

景龍三年司農卿趙履溫奏請以隋代番戶子孫數千

家沒為官奴婢仍充賜口以給貴倖監察御史裴子餘  
以為官戶承恩始為番戶又是子孫不可抑之奏免之  
天寶八載六月十八日京畿及諸郡百姓有先是給役  
在私家驅使者限勅到五日內一切送付內侍省其中  
有自南口及契券分明者各作限約定數驅使雖王公  
之家不得過二十人其職事官一品不得過二十人二品  
不得過十人三品不得過八人四品不得過六人五品  
不得過四人京文武清官六品七品不得過二人八品

九品不得過一人其嗣郡王郡王縣主國夫人諸縣君等請各依本品同職事及京清資官處分其有別承恩賜不在此限其蔭家父祖先有者各依本蔭職減比見任之主其南口請比蜀蠻及五溪嶺南夷僚之類

大厯十四年五月詔曰邕府歲貢奴婢使之離父母之鄉絕骨肉之戀非仁也宜罷之其年八月都官奏伏準格式官奴婢諸司每年正月造籍二通一通送尚書一通留本司並每年置簿點身團貌然後闕金倉部給

衣糧又準格式官戶有受勲及入老者並從良比來因循省司不立文案伏恐日月滋深官戶逃散其受勲及入老者無定數便請令諸司準式造籍送省並孳生及死亡者每季申報庶憑勘會勅旨宜並準式處分自今已後有處闕者委所司奏聞準法科罪

元和四年閏三月勅嶺南黔中福建等道百姓雖處遐俗莫非吾人多罹掠奪之虞豈無親愛之戀緣公私買賣奴婢宜令所在長吏切加捉搦并審細勘責委知非

良人百姓方許文關有違犯者準法處分 八年九月  
詔自嶺南諸道輒不得以良口博馬並勅所在長吏嚴加捉搦如  
有求利之徒以良口博馬並勅所在長吏嚴加捉搦如  
長吏不曾勾當委御史臺訪察聞奏長慶元年三月平  
盧軍節度使薛平奏應有海賊誘掠新羅良口將到當  
管登萊州界及緣海諸道賣為奴婢者伏以新羅國雖  
是外蕃常稟正朔朝貢不絕與內地無殊其百姓良口  
等常被海賊掠賣于理實難先有制勅禁斷緣當管久

蹈域中承前不守法度自收復已來道路無阻遞相販  
鬻其弊尤深伏乞特降明勅起今已後緣海諸道應有  
上件賊誘賣新羅良人等一切禁斷請所在觀察使嚴  
加捉搦如有違犯便準法斷勅旨宜依三年正月新羅  
國使金柱弼進狀先蒙恩勅禁賣良口使任從所適有  
老弱者栖栖無家多寄傍海村鄉願歸無路伏乞牒諸  
道傍海州縣每有船次便賜任歸不令州縣制約勅旨  
禁賣新羅尋有正勅所言如有漂寄固合任歸宜委所

在州縣切加勘會責審是本國百姓情願歸者方得放回寶歷二年十一月勅朝官及節度觀察使自今已後並不許更置私自身驅使

太和二年十月勅嶺南福建桂管容邕管安南等道百姓禁斷掠買餉遺良口前後制勅處分重叠非不明衛中行李元志等雖云買致數實至多宜各令本道施行元和四年閏三月五日及五年九月十八日勅文切加約勒仍逐官各差判官奏當司應管諸司所有官戶奴



婢等處要典及令文有免賤從良條近年雖赦勅諸司皆不為論致有終身不霑恩澤今請諸司諸使各勘官戶奴婢有廢疾及近年七十者請準各令處分其新羅奴婢伏準長慶元年三月十一日勅應有海賊誘掠新羅良口將到緣海諸道賣為奴婢並禁斷者雖有明勅尚未止絕伏請申明前勅更下諸道切加禁止旨宜依會昌五年四月中書門下奏天下諸寺奴婢江淮人數至多其間有寺已破廢全無僧家奴婢既無衣食皆自

營生或聞洪潭管內人數倍一千人已下五百人已上處計必不少臣等商量且望各委本道觀察使差清強官與本州刺史縣令同點檢具見在口數及老弱嬰孩並須一一分析聞奏如先自營生及已輸納者亦別項分析深恐無良吏及富豪商人百姓網維潛計會藏隱事須稍峻法令如有犯者便以奴婢計估當二十千已上者並處極法官人及衣冠奏聽進止如有人糾告便以奴婢充賞待勘知人數續具條流其京城委功德亦

準此條流仍具數奏聞勅旨依奏

其年八月中書門下奏應天下廢寺放奴婢從良百姓者今聞有細口恐刺史已下官人及富豪衣冠商人百姓計會藏隱及量與錢物索取勅下後如有此色並仰首出却還父母如有依前隱蔽有人糾告官人已下遠販商人百姓並處極法其告事人每一口賞錢一百千便以官錢充給續徵所犯人令填納勅旨宜依

六年二月勅山南江淮間寺家奴婢比來有勅釐草或

有父母贖男女將歸歲月既深今却搜檢情非違勅事  
恐擾人如有此色勘驗有憑並宜不要進收自會昌元  
年以後者不在此限

大中五年二月勅邊上諸州鎮送到投來吐蕃迴鶻奴  
婢等今後所司勘問了宜並配嶺外不得隸內地九年  
閏四月二十三日勅嶺南諸州貨賣男女奸人乘之倍  
射其利今後無問公私上客一切禁斷若潛出券書暗  
過州縣所在搜獲以強盜論如以男女傭賃與人責分

口食任於當土五年限為滿不得將出外界

大順二年四月二十日勅天下州府及在京諸軍或因  
收獲百姓男女宜給內庫銀絹委兩軍收贖歸還父母  
其諸州府委本道觀察使取上供錢充贖不得壓良為  
賤

道路

貞觀十四年七月三十日移五嶠道于莎柵復舊路開  
元二十八年正月十三日令兩京道路並種果樹令殿

中侍御史鄭審充使天寶三載五月京兆尹蕭昊奏請  
於要道築甬道載沙實之至於朝堂從之九月昊又奏  
廣之七年四月河南尹韋濟奏于偃師縣東山下開驛  
路通孝義橋北坡義堂路也

廣德元年八月勅如聞諸軍及諸府皆於道路開鑿營  
種衢路隘窄行李有妨苟徇所資頗乖法理宜令諸道  
諸使及州府長吏即差官巡檢各依舊路不得輒有耕  
種并所在橋路亦令隨要修葺

大厯八年七月勅諸道官路不得令有耕種及斫伐樹木其有官處勾當填補

貞元七年八月商州刺史李西華請廣商山道又別開偏道以避水潦從商州西至藍田東抵內鄉七百餘里皆山險行人苦之西華役工十餘萬脩橋道起官舍舊時秋夏水盛阻山澗行旅不得濟者或數日糧絕無所糴西華通山間道謂之偏路人不留滯行者為便

太和二年二月鄭州刺史楊歸厚奏當州郭下官路不

置在州城內使命往來出入非便伏請準汝州例置驛  
路于城西勅旨宜依 其年定州奏當管白石嶺南路  
管驛險峻請移于易州西紫荆嶺路修置從之

開成元年四月昭義節度使奏請開夷儀山路通太原  
晉州從之

大中三年十一月山南西道節度使鄭渥鳳翔節度使  
李玘等奏當道先準勅新開文川谷路從靈泉驛至白  
雲驛共一十所并每驛側近置私客館一所其應緣什



物糧料遞乘並作夫專知官及橋道等開修制置畢其  
斜谷路創置驛五所平州驛一所連雲驛一所松嶺驛  
一所靈谿驛一所鳳泉驛一所並已畢功訖勅旨蜀漢  
道古今歎危自羊腸九曲之盤入鳥道三巴之外雖限  
戎隔夷誠為要害而人御馬匹常困險難鄭渥首創厥  
功李玘繼成巨績校兩路之遠近減十驛之途程人不  
告勞功已大就偃師開路祇為通衢桂陽列亭止于添  
驛此則通千里之險峻便三川之往來實為良能克當

寄任宜依所奏仍付史館

四年六月中書門下奏山南西道新開路訪聞頗不便人近有山水摧損橋閣使命停擁館驛蕭條縱遣重修必倍費力臣等今日延英面奏宣旨却令修斜谷舊路及館驛者臣等商量望詔宣教及鳳翔節度使觀察使令速點檢計料修置或緣館驛未畢使命未可徑通其商旅及私行任取穩便往來不得更有約勒勅旨依奏其年八月山南節度使封敖奏當道先準詔令臣檢討

却修置斜谷路者臣當時差軍將領官健人夫併力修置道路橋閣等去七月二十日畢功通過商旅騾馬擔馱往來七月二十二日已具聞奏訖其館驛先多摧毀破壞併功修樹今並已畢臣已散牒緣路管界州縣及牒鳳翔劍南東西兩川觀察使並令取八月十五日以後于斜谷路過使命謹具如前勅旨宜依仍付所司

街巷

開元十九年六月勅京洛兩都是惟帝宅街衢坊市固

須修築城內不得穿掘為窰燒造磚瓦其有公私修造不得於街巷穿坑取土

廣德元年九月勅城內諸街勿令諸使及百姓輒有種植

永泰二年正月十四日京兆尹黎幹奏京城諸街種植

大歷二年五月勅諸坊市街曲有侵街打墻接簷造舍

等先處分一切不許並令毀拆宜委李勉常切勾當如

有犯者科違勅罪兼須重罰其種樹栽植如聞並已滋

茂亦委李勉勾當處置不得使有所伐致令死損并諸

橋道亦須勾當

貞元四年二月勅京城內莊宅使界諸街坊牆有破壞  
宜令取兩稅錢和僱工匠修築不得科歛人戶十四年  
官街樹缺所司植榆以補之京兆尹吳湊曰榆非九衢  
之玩亟命易之以槐

太和五年七月左右巡使奏伏準令式及至德長慶年  
中前後勅文非三品已上及坊內三絕不合輒向街開  
門各逐便宜無所拘限因循既久約勒甚難或鼓未動

即先開或夜已深猶未閉致使街司巡檢人力難周亦令奸盜之徒易為逃匿伏見諸司所有官宅多是雜賃尤要整齊如非三絕者請勒坊內開門向街門戶悉令閉塞勅旨除準令式各合開外一切禁斷餘依

其月左街使奏伏見諸街鋪近日多被雜人及百姓諸軍諸使官健起造舍屋侵占禁街竊慮停止奸人難為分別今除先有勅文百姓及諸街鋪守捉官健等舍屋外餘雜人及諸軍諸使官健舍屋並令除折所異

禁街整肅以絕奸人勅旨所折侵街舍宜令二箇月限移拆如不礙勅文者仍委本街使看便宜處分 九年八月勅諸街添補樹並委左右街使栽種價直於京兆府取仍限八月裁畢其分析聞奏

大中三年六月右巡使奏義成軍節度使韋讓前任宮苑使日固違勅文于懷真坊西南角亭子西侵街造舍九間勅旨韋讓侵街造舍頗越舊章宜令毀拆

橋梁

顯慶五年五月一日修洛水月堰舊都城洛水天津之  
東有中橋及利涉橋以通行李上元二年司農卿韋機  
始移中橋自立德坊西南置于安衆坊之左南當長夏  
門街都人甚以為便因廢利涉橋所省萬計然每年洛  
水泛溢必漂損橋梁倦于繕葺內使李昭德始創意令  
所司改用石脚銳其前以分水勢自是無漂損之患至  
今

初韋機橋畢上大悅令于中橋南刻一方石列  
其年辰簡速之跡紀一十六字蓋黃絹之辭也

先天二年八月勅天津橋除命婦已外餘車不得令過



開元九年十二月九日增修蒲津橋絙以竹葦引以鐵牛命兵部尚書張說刻石為頌 十九年六月勅兩京城內諸橋及當城門街者並將作修營餘州縣料理

二十年四月二十一日改造天津橋

天寶元年二月廣東都天津橋中橋石脚兩眼以便水勢移斗門自承福東南抵毓財坊南百步 八年二月先是東京商人李秀昇於南市北架洛水造石橋南北二百步募人施財鉅萬計自五年創其始至是而畢

十年十一月河南尹裴迥請稅本府戶錢自龍門東山抵天津橋東造石堰以禦水勢從之

大歷五年五月勅承前府縣並差百姓修理橋梁不逾旬月即被毀折又更差勒修造百姓勞煩常以為弊宜委左右街使勾當捉搦勿令違犯如歲月深久橋木爛壞要修理者左右街使與京兆府計會其事申報中書門下計料處置其坊市橋令當管修理諸街橋京兆府以當府利錢充修造其年八月勅其坊市內有橋不問

大小各仰本街曲當管共修仍令京兆府各差本管官及當坊市所由勾當每年限正月十五日內令畢如違百姓決二十仍勒依前令修文武官一切具名聞奏節級科貶如後續有破壞仍令所由時看功用多少計定數修理不得輒剩料率及有隱欺

貞元元年正月勅宜令京兆府與金吾計會取城內諸街枯死槐樹充修灞澇等橋板木等用仍栽新樹充替

關市

武德九年八月十七日詔梁關之設襟要斯在義止懲  
奸無取苛暴近代拘刻禁御滋章非所以綏安百姓懷  
來萬邦者也其潼關以東緣河諸關悉宜停其金銀綾  
絹等雜物其依格得出關者並不須禁

天授二年七月九日勅其雍州已西安置潼關即宜廢  
省洛州南面北面各置關

長安二年正月有司表請稅關市鳳閣舍人崔融上議  
曰臣伏見有司稅關市事條不限工商但是行人盡稅

者臣謹按周禮九賦其七曰關市之賦竊惟市縱繁巧  
關通末游欲令此徒止抑所以咸增賦稅夫關市之稅  
者惟斂出入之商賈不稅往來之行人今若不論商人  
通取諸色事不師古法乃任情悠悠末代于何瞻仰又  
四海之廣九州之雜關必據險路市必憑要津若乃富  
商大賈豪宗惡少輕死重氣結黨連羣喑鳴則彎弓睚  
眦則挺劍小有失意且猶如此一旦變法定是相驚非  
惟流迸齊人亦自擾亂殊俗求利雖切為害方深而有

司上言不識大體徒欲益帑藏助軍國殊不知軍國益  
擾帑藏愈空且如天下諸津舟航所聚洪舸巨艦千軸  
萬艘交貨往還昧旦永日今若江津河口置鋪納稅稅  
則檢覆覆則遲留比津纔過彼鋪復止非惟國家稅錢  
更遭主司僭賂至如關市之稅史籍有文秦政以雄圖  
武力捨之而不用也漢武以霸畧英才去之而勿取也  
何則關為詰暴之所市為聚人之地稅市則人散稅關  
則暴興暴興則起異圖人散則懷不軌況澆風久扇變

法為難徒欲禁末遊規小利豈知失玄默亂大倫乎古  
人有言王者藏於天下諸侯藏於百姓農夫藏於庾商  
賈藏於篋惟陛下詳之必若師興有費國儲多窘即請  
倍算商賈加斂平人如此則國保富強人免憂懼天下  
幸甚

天寶二年十月勅如聞關已西諸國興販往來不絕雖  
託以求利終交通外蕃因循頗久殊非穩便自今已後  
一切禁斷仍委四鎮節度使及路次所由郡縣嚴加捉

搦不得更有往來

乾元元年八月勅大散關宜依舊令鳳翔收管者

寶應元年九月勅駱谷子午等路往來行客所將隨身  
器仗等今日以後除郎官御史諸州部進奉事官任將  
器仗隨身自餘私客等皆須過所上具所將器使色目  
然後放過如過所上不具所將器使色目數者一切於  
守捉處勒留

元和九年五月豐州奏中受降城與靈州城接界請置



關從之

十二年二月時討淮蔡既久濟師十倍賊知其必屈每  
思竊發於中以緩師期故有折陵關之戟蕪芻蒿之塲  
流矢飛書往往不絕蓋關防之罪也及平淄青後簿書  
獲賞蒲潼關吏文案乃明吏卒取於賊而容其奸也

大中三年七月涇州節度使康季榮奏六月二十七日

收原州城及諸關

石門關驛藏關木峽關  
制勝關六盤關石峽關

其月邠寧監

軍小使張文銳奏本道兵馬今月十三日收蕭關

六年三月隴州防禦使薛達奏伏奉正月二十六日詔  
旨令臣築故關訖聞奏者伏以汧源西境切在故關昔  
有隄防殊無制置僻在重岡之上苟務高深今移要會  
之口實堪控扼舊絕泉井遠汲河流今則臨水挾山當  
川限谷危墻深塹克揚營壘之勢伏乞改為定戎關鈐  
轄往來臣當界又有南由路亦是要衝舊水關亦請準  
前把捉去正月二十七日功今月十七日畢謹畫圖  
進上勅旨薛達新置關城得其要害形于圖畫頗見公

忠宣依所奏

市

貞觀元年十月勅五品以上不得入市 七年七月二十日廢州縣市印顯慶二年十二月十九日洛州置北市隸太府寺

垂拱二年十二月勅三輔及四大都督并衝要當路及四萬戶已上州市令并赤縣錄事並宜省

天授三年四月十六日神都置西市尋廢至長安四年

十一月二十二日又置開元十一年六月二十三日又廢其口馬移入北市

長安元年十一月二十八日廢京中市至天寶八載十月五日西京成遠營置南市華清宮置北市

景龍元年十一月勅諸非州縣之所不得置市其市當以午擊鼓二百下而衆大會日入前七刻擊鉦三百下散其州縣領務少處不欲設鉦鼓聽之車駕行幸處即於頓側立市官差一人權檢校市事其月兩京市諸

行自有正鋪者不得於鋪前更造偏鋪各聽用尋常一樣偏束諸行以濫物交易者沒官諸在市及人衆中相驚動令擾亂者杖八十

開元二年閏三月勅諸錦綾羅縠繡織成紬絹絲絳牛尾真珠金鐵並不得與諸蕃互市及將入蕃金鐵之物亦不得將度西北諸關

大歷八年七月勅京城內諸坊市門至秋成後宜令所由勾當修補

十四年七月令王公百官及天下長吏無得與人爭利  
先于揚州鄆肆貿易者罷之先是諸道節度觀察使以  
廣陵當南北大街百貨所集多以軍儲貨財列置市肆  
名托軍用實私其利息至是乃絕

貞元十四年八月右金吾將校趙洽田岩並配流天德  
軍時屢有中官于京城市肆強買人間率用直百錢物  
買人數千錢物仍索腳價及進奉門戶謂之宮市是時  
吳湊為京兆尹數上言初為修理無幾中貴人等奏云

百姓蒙官准戶部格式其市吏辟師之徒聽於當州縣  
供宮人市買每至市存養頗獲厚利吳湊再論奏者湊  
之金吾舊吏趙洽等獻計也故洽等坐馬湊代宗元舅  
早承恩顧上即位復寵遇之潔廉謹慎未嘗不以公忠  
之言匡啟於上至是又以宮市事懇論于上前事雖不  
從時論歸美

貞元以後京都多中官市物于廛肆謂之宮市不持  
文牒口銜勅命皆以監佑不中衣服絹帛雜紅紫之

物倍高其估尺寸裂以酬價謂之精供富商皆匿名  
深居陳列廛間唯粗厲苦窳市後又強驅入禁中傾  
車輦輦而去色少不甘有毆致血流者中人之出雖  
沽漿賣餅之家無不徹擔塞門以伺其去蒼頭女奴  
輕車名馬惴惴衢巷得免捕為幸京師之人嗟愁叫  
閭訴闕則左右前後皆其人也

三十一年二月赦文應緣宮市並出正文帖依時價買  
賣不得侵擾百姓



寶曆二年十月京兆尹劉栖楚奏術者數之妙苟利于時必以救患伏以前度甚雨閉門得晴臣請便令後每陰雨五日即令坊市閉北門以禳諸陰晴三日便令盡開使啟閉有常永為定式從之

開成五年十二月勅京夜市宜令禁斷

會昌二年四月勅舊課種桑比有勅命如能增數每歲申聞近知並不遵行恣加剪伐列於廛市賣作薪蒸自今委所由嚴切禁斷六年七月勅如聞十六宅置宮

市已來稍苦于百姓成弊既久須有改移自今已後所  
出市一物已上並依三宮直市不得損刻百姓

大中三年九月勅比有無良之人于街市投匿名文書  
及于箭上或旗幡縱為奸言以亂國法此後所由潛加  
捉搦如獲此色使即焚燼不得上聞

五年八月州縣職員令大都督府市令一人掌市  
內交易禁察非偽通判市事丞一人掌判事佐一  
人史一人師三人

掌分行檢察州  
縣市各令準此

其月勅中縣戶

滿三千以上置市令一人史二人其不滿三千戶以上者並不得置市官若要路須置舊來交易繫者聽依三千戶法置仍申省諸縣在州郭下並置市官

城郭

永徽五年十一月十一日和僉雍州夫四萬一千人修京羅城郭三十日畢九門各施觀明德觀五門工部尚書閭立德為治

顯慶五年九月改東明門為賓耀門西明門為宣耀門  
長壽元年九月神都改造文昌臺及造定鼎上東等城  
門修築外郭並鳳閣侍郎李昭德所制時人以為能

開元十八年四月一日築京城九十日畢

二十年都畿採訪使御史中丞張倚請整齊都城侵街  
牆宇

二十三年七月勅兩京城皇城及諸門并助鋪及京城  
守把捉兵之處有城牆若門樓舍屋破壞須修理者皆

與所司相知并量抽當處職掌衛士以漸修營若須登高臨內即聞奏之

天寶二年正月二十八日築神都羅城號曰金城六年十二月二十一日築會城於湯沐所置百司及公卿邸第十二年十月十七日和催華陰扶風馮翊三都丁匠及京城人夫一萬三千五百人築興慶宮城並起樓四十九年畢

至德三年正月二十七日改丹鳳門為明鳳門通化門

為達禮門安上門為先天門及坊名有安者悉改之尋並却如後

建中元年五月築奉天城四年十月上避難于奉天初術士桑道茂奏請城奉天為王者之居至是方驗

貞元元年新作玄武門

九年二月詔復築鹽州城先是貞元三年城為吐蕃所壞自後塞外無保障西戎入寇既城之後邊患頓息

元和三年涇原節度使段佑請修臨涇城在涇州北八

十里以扼西戎之衝詔從之 八年河東節度使張弘靖奏修古舜城從之

長慶四年三月夏州節度使李祐奏于塞外築烏延宥州臨塞陰河陶子等五城以備蕃寇

太和元年四月鳳翔府奏築臨汧城於汧陽縣西北八十里

會昌六年正月開廐宮苑使奏苑內諸面苑子等門共九十四所今伏緣大禮日近準例鑾駕赴郊廟後並請

鑰閉匙鑰各令進入候還宮日即便請却開應赴郊廟  
一物已上請宣下事件前並須搬載出盡其留司官健  
等令併支糧料蠻駕赴郊廟後不得出入勅旨依奏

咸通六年四月西川節度使牛勣奏於蠻界築新安城  
遏戎州功畢時南詔蠻入寇姚鵠陳許大將顏復成鵠  
州奏築二城其年秋六姓蠻攻遏戎州為復所敗退去



唐會要卷八十六

# 欽定四庫全書

史部

唐會要卷

八十七至  
九十

詳校官編修臣溫汝适

編修臣程嘉謨覆勘

總校官降調編修臣倉聖脉

校對官主事臣陳墉

謄錄監生

臣葉中桂

欽定四庫全書

唐會要卷八十七

宋王溥撰

轉運鹽鐵總叙

皇朝自武德永徽以後姜行本薛大鼎諸使皆以漕運  
上言然未能通濟其後監察御史王師順運晉絳之粟  
於河渭之間增置渭橋倉自師順始也

開元二年河南尹李傑為水運使大興漕事

十八年宣州刺史裴耀卿上言請依舊法教倉於河口立輸塲以受米置河陰縣及河陽栢崖集津三門倉議鑿崖開山以車運數十里積於太原倉以利漕運上從之拜耀卿江淮轉運使仍以鄭州刺史崔希逸河南少尹蕭炅為之副轉運鹽鐵之有副使自此始也耀卿主之三年凡運七百萬石省陸運之傭四十萬舊制東都含嘉倉積江淮之米載以大輿運而西至於陝三百里率兩斛計傭錢千此耀卿所省之數也明年耀卿拜侍

中而蕭炅代焉二十五年運米一百萬石二十九年陝郡太守李齊物鑿三門山以通運關三門巔輸岩險之地俾負索引艦昇於安流自齊物始也

天寶三載韋堅代蕭炅以漕水作廣運潭於望春樓之東以通河渭是年楊釗以殿中侍御史為水陸運使以代韋堅先是米至京師或砂礫糠粃雜乎其間開元初詔使揚擲而較其虛實揚擲之名自此始也

天寶十四載八月詔水陸運宜停一年天寶以來楊國

忠王鉞皆兼重使以權天下故轉運之事自耀卿以降罕聞肅宗初第五琦始以錢穀得見請於江淮分置租庸使市輕貨以救軍食遂拜監察御史為之使乾元元年加度支郎中尋兼中丞為鹽鐵使始立鹽鐵法就山海井竈收權其鹽立鹽院官吏其舊業戶洎浮人欲以鹽為業者免其雜徭隸鹽鐵使盜煮私鹽罪有差亭戶自租庸以外無得橫賦人不益稅而國用饒明年琦以戶部侍郎同平章事詔兵部侍郎呂諲代之寶應三年

元載以中書侍郎代呂諲時淮河阻兵飛輓路絕鹽鐵租賦皆沂淮而上以侍御史穆寧為河南道轉運租庸鹽鐵使尋加戶部員外遷鄂州刺史以總東南貢賦時議以寇盜未戢關東漕運宜有倚辦遂以通州刺史劉晏為戶部侍郎京兆尹度支鹽鐵轉運使鹽鐵兼漕運自晏始也二年拜吏部尚書同平章事依前充使晏始以鹽利為漕傭自江淮至渭橋率十萬斛傭七千緡補網吏督之不發丁男不勞郡縣自古未之有也晏以書

遺元載曰浮於淮泗達於汴入於河西經底柱硤石楚帆越客直抵建章長樂此安社稷之奇業也晏賓於東朝猶有官謗公終始故舊不信流言賈誼復召宣室弘羊重興功利敢不悉力以答所知驅馬陝郊見三門渠津遺跡到河陰鞏洛見宇文愷立梁公堰分河入渠及李傑新堤故事飾像河廟凜然如生步步探討知昔人用心則潭衡桂陽必多積穀可以淪波挂席西指長安三秦待此而飽六軍待此而強天子無憂都人胥悅四



方旅拒者可以破膽三河流離者於茲請命公匡輔明  
主為富人侯此今之切務也僕願湔洗瑕穢一罄愚誠  
以副公之心且晏勤於官不辭水火然運之利病各有  
四五焉晏自尹京人為計相共五年矣京師三輔百姓  
唯苦稅畝傷多若每年得江湖二三十萬石即徭賦頓  
減歌舞皇澤其利一也東都殘毀百無一存若米運流  
通饑人皆附村落邑屋從此滋多命之日引海陵之倉  
以食輦洛其利二也諸將有在邊者諸戎有侵敗王略

者或聞三江五湖陳陳紅粒雲帆桂檝輸納帝鄉可以  
震耀夷夏其利三也自古帝王書同文車同軌日月所  
照莫不率俾今舟車既通商賈來往百貨雜集航海梯  
山漸及貞觀永徽之盛其利四也所疑者函陝凋殘  
東周尤甚過宜陽熊耳至成臯五百里中編戶千餘而  
已人烟蕭條輿必脫輻牛必羸角棧車亦不易求今於  
無人之境興此勞人之運固難就矣其病一也汴流渾  
渾不脩則澱頃因寇難曾未疏決澤滅木岸善崩役夫

需於沙津吏旋於寧千里洄上周水行舟其病二也東亘底  
柱澠池二陵北河運處五六百里戍卒久絕奪攘奸宄窟穴  
囊橐夾河為藪豺狼狺狺舟行所經寇亦能往其病三也  
東自淮陰西臨蒲坂亘三千里屯戍相望中軍皆鼎司元  
侯賤卒亦儀同青紫每云食半菽又云無挾纊輓漕所至  
船到便留即非單車使折簡書所能制矣其病四也是願  
畢其思慮奔走之惟中書評其利病裁成之晏見一水不  
通願荷鍾先往見一粒不運願負米先趨焦心苦形期報

明主丹誠未貫漕引多虞屏營中流掩泣獻狀自此每歲運米數十萬石自江淮北列置巡院搜擇能吏以主之廣牢盆以來商賈凡所制置皆自晏始廣德二年正月復以第五琦專判度支鑄錢鹽鐵事而晏以檢校戶部尚書為河南及江淮以東轉運使乃與河南副元帥計會開決汴河水永泰二年晏為東道轉運常平鑄錢鹽鐵使琦為關內河東劍南三州轉運常平鑄錢鹽鐵使大厯五年詔停關內河東三州轉運常平鹽鐵使自此晏與戶部侍郎韓

混分領關內河東山南劍南租庸青苗使至十四年天下財賦皆以晏掌之建中元年詔曰朕以征稅多門郡邑凋耗聽於羣議思有變更將致時雍宜遵古訓其江淮米準旨轉運入京者及諸軍糧儲宜令庫部郎中崔河圖權領之今年夏稅以前諸道財賦多輸京師者及鹽鐵財貨委江州刺史包佶權領之天下錢穀皆歸金倉部委中書門下簡兩司郎官準格式條理尋貶晏為忠州刺史晏既罷黜天下錢穀歸尚書省既而出納無

所統乃復置使領之是年三月以韓洄為戶部侍郎判度支  
金部郎中杜佑權勾當江淮水陸運使行劉晏韓滉舊制先  
是晏為宰臣楊炎所惡貶忠州刺史尋殺於忠州兵興以來  
凶荒相屬京師斗斛萬錢官厨無兼時之食百姓在畿  
甸者拔穀接穗以供禁軍晏既遺元載書陳轉稅米利  
病歲入米數十萬斛以濟關中代第五琦鹽務法益精  
密初年入錢六十萬季年則十倍其初大厯末通天下  
之財而計其所入總一千二百萬貫而鹽利過半李靈

耀之亂河南節度使據土不奉法賦稅不上州縣益減  
晏以羨餘相補人不加賦所入仍舊議者稱之其商權  
財用之術者必一時之選故晏沒後二十餘年韓洄元  
琇裴腆包佶盧貞李衡相繼分掌財賦皆出晏門下屬  
吏在千里外奉教如目前四方水旱及軍府纖芥莫不  
先知焉其年詔曰天下山澤之利當歸王者宜總隸鹽  
鐵使三年以包佶為左庶子汴東水陸運鹽鐵租庸使崔  
縱為右庶子汴西水陸運鹽鐵租庸使四年度支侍郎

趙贊議常平事竹木茶漆盡稅之茶之稅肇於此矣

貞元元年元琇以御史大夫為鹽鐵水陸運使其年七月以尚書右僕射韓滉統之滉歿宰相竇參代之

五年十二月度支轉運鹽鐵奏比年自揚子運米皆分配緣路觀察使差長綱發遣運路既遠實為勞人今請當使諸院自差綱節級般運以救邊食從之

八年詔東南兩稅財賦自河南江淮嶺南山南東道至渭橋以戶部侍郎張滂主之河東劍南山南西道以戶



部尚書度支使班宏主之今戶部所領三川鹽鐵轉運自此始也其後宏滂互有短長宰相趙憬陸贄以其事上聞由是遵大厯故事如劉晏韓滉所分焉

九年張滂奏立稅茶法郡國有茶山及商賈以茶為利者委院司分置諸場立三等時常為價為什一之稅是歲得緡四十一萬茶之有稅自滂始也自後裴延齡專判度支與鹽鐵益殊塗而理矣十年潤州刺史王緯代之理於朱方數年而李琦代之鹽院津堰攻張侵剝不

知紀極私路小堰厚斂行人多自錡始時鹽鐵轉運有上都留後以副使潘孟陽主之王叔文權傾朝野亦以鹽鐵副使兼學士為留後故鹽鐵副使之俸至今獨優順宗即位有司重奏鹽法以杜佑判度支鹽鐵轉運使理於揚州元和二年三月以李巽代之先是李錡判使天下權酷漕運由其操割專事貢獻牢其寵渥中朝秉事者悉以利交鹽鐵之利積於私室而國用日耗巽既為鹽鐵使大正其事其堰埭先隸浙西觀察使者悉歸

之因循權置者盡罷之增置河陰教倉置桂陽監鑄平陽  
銅山為錢又奏江淮河南峽內充鄆嶺南鹽法鹽院去  
年收鹽價緡錢七百二十七萬比舊法虛張估一千七  
百八十餘萬非實數也今請以其數除為煮鹽之外付  
度支收其數鹽鐵使煮鹽利繫度支自此始也又以程  
昇為揚子留後四月五日巽卒自權估之興唯劉晏得  
其術而巽次之雖初年之利不如晏季年之利則三倍  
於晏矣舊制每歲運江淮米五十萬斛至河陰留十萬

四十萬送渭倉晏歿久不登其數惟巽秉使三載無升斗之缺焉六月以河東節度使李鄴代之五年鄴為淮南節度使以宣州觀察使盧坦代之六年坦奏每年江淮運糴米四十萬石到渭橋近日欠闕大半請旋收糴逐年貯脩從之坦改戶部侍郎以京兆尹王播代之播遂奏元和五年江淮河南嶺南峽中兗鄆等鹽利錢六百九十八萬貫比量改法已前鹽利時價四倍虛估即此錢當為千七百四十餘萬貫矣請付度支收管從之

其年詔曰兩稅法悉委郡國初極便人但緣約法之時不定物估今度支鹽鐵泉貨是司各有分巡置於都會爰命帖職周視四方簡而易從庶叶權便政有所弊事有所宜皆得舉聞副我憂寄以揚子鹽鐵留後為江淮已南兩稅使江陵留後為荆衡漢沔東界彭蠡南及日南兩稅使度支山南西道分巡院官充三川兩稅使峽內煎鹽五監先屬鹽鐵使今宜各屬度支便委山南西道兩稅使兼知糶賣峽內鹽屬度支自此始也

七年王播奏去年鹽利除割峽內鹽收錢六百八十  
五萬從實估也又奏商人於戶部度支鹽鐵三司飛錢  
謂之便換

八年以崔陵為揚子留後淮嶺以東兩稅使崔祝為江  
陵留後荆南以東兩稅使十三年播又奏以軍興之時  
財用是切頃劉晏領使皆自按置租庸至於州縣不臧錢穀  
利病物之虛實皆得而知今臣守務在城不得自往請  
令臣副使程昇出巡江淮具州府上供錢穀一切勘問

從之閏五月异至江淮得錢一百八十五萬貫以進其  
年以播守禮部尚書以衛尉卿程异代之明年异以本  
官兼御史大夫平章事

十四年异卒以刑部侍郎柳公綽代之長慶初王播復代公  
綽四年王涯以戶部侍郎代播敬宗初播復以鹽鐵使為揚  
州節度使文宗即位入覲以宰相判使其後王涯復判  
二使表請使茶山之人移植根舊有貯積皆使焚棄  
天下怨之九年以事誅而令孤楚以戶部尚書右僕射

主之以是年茶法大壞奏請付州縣而入其租於戶部  
人人悅焉

開成元年李石以中書侍郎判收茶法復貞元之制也  
三年以戶部尚書同平章事楊嗣復主之多章前監院之  
陳事自是年至大中壬申凡十五年多任元臣以集其務  
崔珙自刑部尚書拜杜悰以淮南節度使領之既而皆  
踐公台薛元賞李執方盧弘正馬植敬晦五人於九年  
之中相踵理之植亦自是居相位



大中五年二月以戶部侍郎裴休為鹽鐵轉運使明年八月以本官平章事依前判使始者漕米歲四十萬斛其能至渭倉者十不三四漕吏狡蠹敗溺百端官舟之沉多者歲至七十餘隻緣河奸犯大紊晏法休使寮屬按之委河次縣令董之自江津達渭以四十萬斛之傭計緡二十八萬悉使歸諸漕吏巡院胥吏無得侵牟舉之為法凡十事奏之六年五月又立稅茶之法凡二十條陳奏上大悅詔曰裴休興利除害深見奉公盡可其

奏由是三歲漕米至渭濱積一百二十萬斛無升合沉棄焉

十年裴休出鎮澤潞尋以抑仲郢夏侯孜杜棕迭判之皆稱其任

咸通五年南蠻攻安南府連歲用兵饋輓不集詔江淮鹽鐵巡院和僱舟船運淮南浙西道米至安南乾符中又以崔彥昭王凝判之二年凝以所補吏生賦改官復命裴垣判之後高駢自潤州移鎮淮南亦就判使務

中和元年黃巢犯闕車駕出狩興元府又以蕭遘韋昭度判之及命侍中王鐸為行營都統率諸道之兵收復京城慮調發不時乃以昭度兼供軍使至光啟中所在征鎮自擅兵賦皆不供歲時但貢奉而已由是江淮轉運路絕國命所能制者唯河西山南劍南嶺西道洎宦官田令孜自蜀中扈從召募新軍號左右神策共四十都并南衙官屬僅萬餘三司轉無調發之所舊日兩池擁鹽稅課鹽鐵使特置鹽官以總其事自亂離之後

河中節度王重榮兼領樞務歲出課鹽三千車以進至是令攷以軍食闕供乃舉廣明故事請以兩池樞務歸之鹽鐵詔下重榮上章論計竟不能奪天復初朱全忠兼鎮河中兩池鹽課始加至五十車自天順年後又以孔緯杜讓能崔昭緯嗣薛王知柔徐彥若韓建崔胤裴樞柳璨相次判之

漕運

舊制凡陸行之馬程日七十里步及驢五十里車三十

里水行之程舟之重者汴河日三十里江四十里餘水  
四十五里空舟汴河四十里江五十里餘水六十里浩  
流之舟即輕重同制河口一百五十里江一百里餘水  
七十里其如底柱之類不拘此限若遇風水淺不得行  
者即於隨近官司申牒檢記聽拆半印武德八年十二  
月十八日水部郎中姜行本請於隴州開五節堰引水  
通運許之

永徽元年薛大鼎為滄州刺史界內有無棣河隋末填

塞大鼎奏之引魚鹽於海百姓歌之曰新河得通舟楫  
利直達滄海魚鹽至當日徒行今騁駟美哉薛公德滂  
被

顯慶元年十月苑西面監褚朗請開砥柱三門鑿山架  
險擬通車陸運於是發卒六千人一月而功畢後水漲  
引舟竟不能進

咸亨三年關中饑監察御史王師順奏請發晉絳州倉  
以贍之上委以漕運河渭之間舟楫相繼置倉於渭南

東師順之始也

大厯元年六月九日於東都立德坊南穿新潭安置諸  
州租船

神龍二年滄州刺史姜師度於薊州之北漲水為溝以  
脩契丹奚之入寇畢約舊渠傍海穿漕號為平寇渠以  
避海難運糧者至今賴焉

開元二年河南尹李傑奏汴州東有梁公堰破江淮漕  
運不通傑奉發汴鄭丁夫以濬之省功速就公私深以

為利刻石水濱以紀其績九年五月二十五日勅水運  
米揚擲四五六七月米一斛欠五合三八月米一斛欠  
四合二九月米一斛欠三合正十一月十二月米一  
斛欠二合並與納

十五年正月十二日令將作大匠范安友檢行鄭州河  
口斗門先是洛陽人劉宗器上言請塞汜水舊汴河於  
下流滎澤界開梁公堰置斗門以通淮汴擢拜宗器左  
衛率府曹曹至是新漕填塞行舟不通貶宗器為循州



安懷戍主安友遂發河南府懷鄭汴滑衛三萬人疏決  
開舊河口旬日畢二十年京師穀價踴起上召京兆尹  
裴耀卿問以救人之術耀卿奏曰昔貞觀永徽之際祿  
重米廣每歲不過二萬石便足今國用漸廣漕運數倍  
猶不能支從都至陝河路艱險既用陸運無由廣致能  
開漕運變陸為水則有所餘動盈萬計且江南租舡候  
水始進吳人不便漕輓由是所在停留日月既淹遂生  
竊盜臣望於河口置一倉納河東租米便放船歸從河

口即分入河洛官自僱船載運至三門之東置一倉三門既水險即於河岸用小車運十數里至三門之西又置一倉每運至倉即搬下貯納水通即運水細便止自大原倉汴河入渭更無留停所省鉅萬前漢都關中年月稍久及隋亦在京師緣河皆有舊倉所以國用常贍上深然其言至二十二年八月十四日置河陰縣及河陰倉河西栢崖倉三門東集津倉三門西鹽倉開三門山十八里陸路以避湍險自江淮而汴鴻溝悉納河陰

倉自河陰送納含嘉倉又遞納太原倉

所謂北運

自太原倉

浮渭以實關中上大悅尋以耀卿充江淮轉運使以鄭  
州刺史崔希逸河南少尹蕭昊為副三年凡運七百萬  
石省脚三十萬貫或說耀卿進所省脚錢以表其功答  
曰此並公事豈宜以小道邀名求寵也河陰上倉天寶  
後廢

大歷四年戶部尚書劉晏奏置汴口倉

二十六年十一月五日潤州刺史齊澣奏常州北界隔

吳江至瓜步江為限每船渡繞瓜步江沙尾沿緣六十里多為風濤所損臣請於京口埭下直截渡江二千里開伊婁河二十五里即達揚子縣無風水災又減租腳錢歲收利百億又立伊婁埭皆官收其課迄今用之二十八年九月魏州刺史盧暉開通濟渠自石灰窰引流至州城西都注魏博夾州製樓百餘間以貯江淮之貨

二十九年十一月陝郡太守李齊物鑿三門上路通流

便於漕運開渠得古黎鏹三於石下背有文曰平陸遂  
改河北縣為平陸縣至天寶元年正月二十五日渠成  
其年陝郡太守韋堅奏引漚水開廣運潭於望春樓東  
自華陰永豐倉以通河渭潭成至二年三月二十六日  
勅古之善政貴於足食欲求富國必先利人朕以關輔  
之間尤資殷贍比來轉輸未免艱辛故置此潭以通漕  
運萬代之利一朝而成其潭宜以廣運為名其年京兆  
尹韓朝宗分渭水入自金光門置潭於西市之西街以

貯材木

永泰二年七月十日鑿運水渠自京兆府直東至薦福寺東北街至國子監正東至於城東街正北至景風門逾近喜門入西苑濶八尺深丈餘京兆尹黎幹奏也

貞元二年五月勅漕運通流國之大計其河水每至春夏之時多被兩岸由來盜開斗門舟船停滯職此之由宜委汴宋等州觀察使選清強官專知分界勾當其鄭州徐州泗州界各仰刺史準此處分仍令知汴州支遣院

官計會勾當十五年二月于頔奏移轉運汴州院於河陰以汴州累遇兵亂失散錢帛故也

元和三年四月增置河陰倉屋一百五十間

十一年十二月始置淮潁水運揚子等諸縣米自淮陰沂沭至壽州西四十里入潁口又沂沭至潁州沈丘界五百里至於陳州項城又沂沭五百里入於潁河又三百里輸於鄆城得米五十萬石附之以芟一千五百萬束計其功省汴運七萬六千貫寶曆二年正月鹽鐵使

王播奏揚州城內舊漕河水淺舟船澀滯轉輸不及期  
程今從閭門外古七里港開河南東屈曲取禪智寺橋  
東通舊官河計長一十九里其功役所費當使自方圓  
從之

咸通三年五月南蠻陷交趾徵諸道兵赴嶺南詔湖南  
水運自湘江入零渠并江西水運以饋行營諸軍湘零  
汴運功役艱難軍屯廣州乏食潤州人陳碯石詣闕上  
書言江西湖南汴流運糧不濟軍期臣有奇計以饋南



軍帝召見因奏臣弟聰思昔曾任雷州刺史家人隨海船至福建往來大船一隻可致千石自福建不一月至廣州得船數十艘便可致三五萬石又引劉裕海路進軍破孫循故事乃以礮石為鹽鐵巡官往揚子縣專督海運於是軍不闕供

八年三月安南都護高駢奏安南至小邑管水路湍險已令工人鑿去巨石漕船無滯詔褒美之

### 轉運使

開元二十一年八月侍中裴耀卿充江南淮南轉運使  
二十二年九月太府少卿蕭炆充江淮處置轉運使天  
寶二年四月陝郡太守韋堅加兼勾當緣河及江淮轉  
運使四年八月楊釗除殿中侍御史充水陸轉運使乾  
元元年三月第五琦除度支郎中充諸色轉運使二年  
十二月兵部侍郎呂諲充勾當轉運使元年建子月戶  
部侍郎元載充江淮轉運使寶應元年六月二十八日  
戶部侍郎劉晏充勾當轉運使廣德二年正月戶部侍

卽第五琦充諸道轉運永泰元年正月劉晏充東畿淮南浙江東西湖南山南東道轉運使第五琦充畿關內河南劍南山南西道轉運使大厯四年三月劉晏除吏部尚書兼御史大夫充東都河南江淮山南東道轉運使建中二年十一月度支郎中杜佑兼御史中丞江淮水陸運使三年十二月二十日包佶除庶子充汴東水陸運使崔縱除右庶子充汴西水陸運使貞元元年三月元琇加御史大夫充諸道水陸運使其年七月尚書

右僕射韓滉江淮轉運使五年二月中書侍郎竇參諸道轉運使八年三月張滂除侍郎充諸道轉運使十年十月潤州刺史王緯兼諸道轉運使五年十二月以浙西觀察使李錡充諸道轉運使永貞元年以司空平章事杜佑再兼諸道轉運使元和元年四月兵部侍郎李巽充諸道轉運使三年六月刑部尚書李鄲充諸道轉運使五年十二月盧坦除刑部侍郎充諸道轉運使六年四月刑部侍郎王播充諸道轉運使長慶元年二月

王播復為刑部尚書充諸道轉運使四年四月王涯為  
戶部侍郎充諸道轉運使寶曆元年正月王播為淮南  
節度又充諸道轉運使太和九年十二月右僕射令狐  
楚充諸道轉運使開成元年四月戶部尚書平章事李  
石充諸道轉運使三年十月楊嗣復除戶部尚書諸道  
轉運使五年二月戶部尚書崔珙充諸道轉運使會昌  
四年七月左僕射充平章事杜悰充諸道轉運使六年  
四月以大理卿馬植為刑部侍郎充諸道轉運使大中

五年刑部侍郎裴休充諸道轉運使十一年兵部侍郎  
柳仲郢充諸道轉運使十一年二月戶部侍郎夏侯孜  
充諸道轉運使十四年尚書左僕射杜棕復充諸道轉  
運使咸通五年十二月戶部侍郎劉鄴充諸道轉運使  
六年十月兵部侍郎于琮充諸道轉運使乾符元年二  
月崔彥昭為兵部侍郎充諸道轉運使其年又以兵部  
尚書王凝充諸道轉運使二年二月兵部侍郎裴坦充  
諸道轉運使四年六月以宣歙觀察使高駢為潤州刺

史充諸道轉運使六年移節淮南領使如故中和元年  
兵部侍郎蕭遘充諸道轉運使其年中書侍郎平章事  
韋昭度充諸道轉運使光啟二年三月刑部尚書孔緯  
充諸道轉運使大順二年門下侍郎杜讓能充諸道轉  
運使景福二年十一月吏部尚書平章事崔昭緯充諸  
道轉運使乾寧二年京兆尹嗣薛王知柔為戶部尚書  
充諸道轉運使其年九月門下侍郎平章事徐彥若充  
諸道轉運使光化三年八月左僕射平章事崔胤充諸

道轉運使天祐元年右僕射裴樞充諸道轉運使其年  
門下侍郎平章事柳璨充諸道轉運使

河南水陸運使

開元二年閏二月陝郡刺史李傑除河南少尹充水陸  
運使至三年十二月畢構為河南尹不帶水陸運使至  
天寶三年十一月李齊物除河南尹又帶水陸運使貞  
元十年二月河南尹齊抗充河南水陸運使至元和六  
年十月勅河南水陸運使宜停



陝州水陸運使

先天元年十月李傑為刺史充水陸運使自此始也已  
後刺史常帶使天寶十載五月崔無諤除太守不帶水  
陸運使度支使楊國忠奏臣請自勾當遂加國忠陝郡  
水陸運使至十二年正月二十一日勅陝運使宜令陝  
郡太守崔無諤充使楊國忠充都使勾當至貞元十三  
年四月陝號觀察使于頔兼陝州水陸運使至元和六  
年十月勅陝州水陸運使宜停

開元十三年五月二十八日勅陝州水陸運使令別自置印二十五年六月二十三日詔河南陝運兩使每年常運一百八十萬石米送京近已減八十萬石今據太倉米數支計有餘其今年所運一百萬石亦宜停

建中二年十二月停江淮水陸運使轉運事委度支處置三年八月分置汴東西水陸運使兩稅鹽鐵使貞元三年正月諸道水陸運使及度支巡院江淮轉運使並宜停



唐會要卷八十七